

27 JUL 2002
MCA-Bahas/I
PERSOALAN DISIPLIN JADI TUMPUAN PADA AGM MCA

KUALA LUMPUR, 27 Julai (Bernama) -- Persoalan disiplin menjadi tumpuan perbahasan para perwakilan pada Perhimpunan Agung Ke-47 MCA di sini hari ini dengan kebanyakan perwakilan meminta parti mengambil tindakan tegas bagi menangani masalah seumpama itu dalam parti.

Ng Siew Kim, wakil MCA Pulau Pinang, dalam ucapannya berkata masalah disiplin parti itu tidak lagi boleh dipandang ringan dan menggesa parti mengambil tindakan tegas bagi meningkatkan disiplin di semua peringkat dalam parti.

"Semua perwakilan adalah tulang belakang parti dan disiplin di kalangan para perwakilan telah semakin merosot dan semua ini perlu dihentikan," katanya.

Selain kejadian melempar kerusi pada Perhimpunan Agung Tahunan Pemuda tahun lepas, parti itu juga berdepan dengan kejadian menampar pada Perhimpunan Agung Wanitanya baru-baru ini.

Wakil dari Negeri Sembilan Kapten (B) Lim Zhen mengutuk Jawatankuasa Disiplin parti itu yang gagal mengambil sebarang tindakan terhadap mereka yang melanggar disiplin itu.

Lim Zhen berkata terdapat sejumlah pemimpin yang secara rahsia memberi sokongan kepada mereka yang melanggar disiplin itu.

Selain isu disiplin, para perwakilan turut membahaskan persoalan mengenai keganasan, pelaksanaan Undang-undang Hudud oleh PAS dan masalah berjudi di kalangan masyarakat Cina semasa kejohanan Piala Dunia baru-baru ini.

Wakil Kedah Tan Kien Ming pula berkata pengajaran mata pelajaran sains dan matematik di sekolah aliran Cina patut dikekalkan dalam bahasa ibunda sepertimana sekarang.

Beliau menggesa kerajaan menghormati kehendak masyarakat itu agar bahasa ibunda mereka digunakan dalam pengajaran mata pelajaran itu di sekolah vernakular.

Pengerusi Wanita Melaka Kiam Set Har dalam ucapannya berkata beliau kagum dengan Perdana Menteri Datuk Seri Dr Mahathir Mohamad yang berani mengkritik orang Melayu.

Beliau berkata masalah yang dihadapi oleh masyarakat Melayu terletak pada dasar-dasar Barisan Nasional yang memanjakan orang Melayu.

-- BERNAMA
YBK YBK RHM